

# एफिससला वोतुप तेपा कितुपतिवाला पावलकी टिवु यिकी

## दी थेपकी कोर्ला

दी यिकी ति एफिसस ग्येसाकी तेपा कितुपतिवाला पावलकी टिवु यिन। तेरी सिनाड गोमाला कोन्छ्योककी च्यु ति तिवाला हाक्को ज्यितुप ति पावलला पप क्यानोक। ती च्यु ति कोन्छ्योककी ख्रीष्टला चोछ्येवु जो नाङ्नी खोकी ज्येवु च्यालक याङ्ना देवाच्येन ताड जम्बुलिङकी तेरी च्यालकतिवा खोकी ओङला ज्याङ नाङ्सुङ सिरुप यिन (१:१०)। दी यिकी ति कोन्छ्योककी गिपातिवाला पावलकी गोङ्बा शुवु यिकी साङ यिन। तमा मीतिवाला ख्रीष्टकी मिङला सेम च्यिक राङ च्युङ्नी चोछ्येवु कोन्छ्योककी च्यु तिला तेन्दोक वोतुप जोपला टिवु यिन।

दी यिकीकी थल्माला मीतिवाला सेम च्यिक राङ च्युङ्गुपकी कोर्ला सिक्या वे। तमा पपा कोन्छ्योककी खोरे गिपाला पेनी तिवाला खोरे सेवु येशू ख्रीष्ट नेसुर माफ नाङ्नी तिवाला दिक्पा ने थर च्यिनी कोन्छ्योककी चोछ्येवु थाक्छ्येतुप ति खोकी थु चाङ्मा नेसुर तेन्तेन क्या नाङ्सुङ। ड्यिवाला ति पावलकी दी यिकी रोकुपतिवा चुक क्यानी मिजी क्योड गोकिवी सिरुप कोर्ला गोङ्बा शुनी टिनी वे। तमा ख्रीष्टला तेपा कितुपतिवा च्यिक राङ च्युङ्नी मिजी टेङ्बु क्योङ्शी सिनी टिनी वे।

कोन्छ्योककी गिपातिवा च्यिक राङ च्युङ्गुप कोर्ला दुका पेटिवा साङ सिक्या वे। चर्च ति जु यिन, तीकी गो ति ख्रीष्ट यिन। ती चर्च ति खाङ्बा दोके यिन, ती खाङ्बाकी सुरकी दो ति ख्रीष्ट यिन। चर्च ति नमा दोके यिन, तीकी

माक्पा ति स्त्रीष्ट यिन। दी यिकीला दुका खक्छ्येवु येन्देनतिवा साड बिन वे।  
तिवा ति जिन्बा, दिक्पा पङ्गुप, कटिन, चाड्मा ताड स्त्रीष्टकी डियङ्ज्येकी  
वोसिर यिन।

### मुला राड वोतुप लोप्च्येनतिवा

- पावलकी डोशी १:१-२
- स्त्रीष्ट ताड चर्च १:३-३:२१
- स्त्रीष्टला वोतुप मिजी सम्बा ४:१-६:२०
- यिकी टिनी सिन्दा क्यावु ६:२१-२४

### पावलकी टसी देलेक

१ टसी देलेक! दी यिकी ति कोन्छ्योककी नोवा नेसुर ख्रीष्ट येशूकी लोमा छ्ये च्युङ्गुप ड पावलकी छ्योक नेसुर येशू ख्रीष्टला तेपा क्यानी खोङ्तेमुं वोतुप एफिससकी मीतिवाला टिवु यिनो। २दाक्पी पपा कोन्छ्योक ताड चोवो येशू ख्रीष्ट नेमा ख्यिराडला कटिन ताड लोदिमु वुङ्शी।

### ख्रीष्टकी नङ्गुप मोलाम

३दाक्पी चोवो येशू ख्रीष्टकी पपा कोन्छ्योकला सोवा वुङ्शी, च्यिलासिसिन खोकी येशू ख्रीष्ट नेसुर देवाच्येनला वोतुप तेरी मोलाम ति दाक्पुला नङ्नी वे। ४ती मोलाम ति खोकी थोङ्दाडला दाक्पु चाङ्मा ताड क्येन मेतुप च्युङ्शी सिनी जम्बुलिङ् ज्येङ्गुप सिनाङ् गोमाला के खोकी दाक्पुला पेन नङ्गुप यिन। ५कोन्छ्योककी दाक्पुला ड्रियङ्ज्ये क्या नङ्गुप तप्की येशू ख्रीष्ट नेमा दाक्पुला खोरे पुज्युङ् जोपला गोमाला के पेन नङ्सुङ्। ती ति खोकी गा लङ्गुप नोवा यिन। ६तुक क्यानी खोकी ड्रियङ्ज्येवु सेवु नेसुर दाक्पुला तुक राङ् नङ्गुप खोकी मोवा वोतुप कटिनकी थोक्ला सोवा देकुप। ७तमा खोकी ग्यक्चेकी कटिन नेसुर येशू ख्रीष्ट दाक्पी दिक्पी थोक्ला टुङ्नी खोकी ठककी दाक्पी दिक्पा ता च्यिनी

दाक्पुला थर्वा ड्येन वे। ८खोकी ती कटिन ति हाक्कोशी नोनी तेरी च्यु ताङ् रिक्पा ति दाक्पुला नाङ्सुङ्। ९खोकी येशू ख्रीष्ट नेसुर गोमाला के जो नङ्गुप खोला गा लङ्गुप नोवाला वोतुप छ्याककी ताम्डे ति दाक्पुला तेरी हाक्को च्यिसुङ्। १०कोन्छ्योककी नोवा ति काङ् यिन सिसिन तुजे छेसिमा देवाच्येन ताङ् जम्बुलिङ्ला वोतुप तेरी ख्रीष्टकी मुला खोकी ओङ्ला च्युङ्शी। ११खोकी तेरी लाका ति खोरे नोवा नेसुर राङ् क्या नङ्गिगी। तमा खोकी नोवाला वोतुप दोके राङ् दाक्पुला गोमाला के पेन नङ्गुप तप्की दाक्पु खोकी पुज्युङ् च्युङ्नी वे। १२तुक क्यानी दाक्पु गोमाला नेज्युनी ख्रीष्टला रेवा कितुपतिवा तेरीकी कोन्छ्योकला मोवा ताङ् सोवा देकुपला खोकी पेन नङ्गुप यिन। १३ती ख्रीष्ट नेसुर दाक्पु साङ् कोन्छ्योककी सुङ् टेङ्बु थोनी खोकी थाक्छ्येन नङ्गुप थु चाङ्माकी त ग्यप्नी वे। ती सुङ् टेङ्बु ति ख्यिराडला दिक्पा ने थर ज्यितुप लेन ल्यामु यिन। १४ती कोन्छ्योककी थु चाङ्मा ति खोरे गिपातिवा तेरीला थर माच्यिवा सेक्ला तिवाला थाक्छ्येन नङ्गुप ति तेरी थोक्किवी सिनी तेन्तेन कितुपला दाक्पुला नङ्गुप यिन। तीकी थोक्ला खोला सोवा देकुप।

### पावलकी मोपोर

१५-१६तुक क्यानी ड् मोपोर कितुप पेला नरी ख्यिराडला टेन्नी

कोन्छ्योकला थुचिछे बुलिन। च्यिलासिसिन चोवो येशूला ख्यिरा तेपा क्यावु ताड तेरी तेपा कितुप मीतिवाला ख्यिरा च्यम्बा क्यावु ति डे हाक्कोसुड। १७तमा दाक्पी चोवो येशू ख्रीष्टकी मोवा वोतुप पपा कोन्छ्योककी ख्यिराडला खोकी च्यु ताड रिक्पाकी सेम नङ्नी खोला डा शे थुप्शी सिनी ड नरी मोपोर कितिन। १८ख्योरो सेम पेनी चुका रेवाकी थोक्ला कोन्छ्योककी ख्यिराडला कताड वे, तमा खोला तेपा कितुपतिवाला खोकी नङ्गुप हलेवु मोलाम ति ग्यक्चे वे सिरुप ति ख्यिरा हाक्को थुप्शी सिनी ड मोपोर कितिन। १९तमा दाक्पु तेपा कितुपतिवी थोक्ला खोकी छासेकी डार ति काड यिनोक सिनी ख्यिरा हाक्कोशी सिनी मोपोर कितिन। ती डार ति खोकी चोछ्येवु डार यिन। २०ती डार नेसुर खोकी ख्रीष्टला टुङ्गुप ने डोसु लङ्नी देवाच्येनला खोकी छ्याक यावी थाकाला ज्याक नाङ्सुड। २१तमा जम्बुलिङ तेरीला ग्येला कितुप ताड तेरी ओङ्ज्येन ताड डार ताड ग्येल्खाप ताड दी कल्वाला तिराड मिन यिने त वुङ्गुप कल्ला सेक्ला वुङ्गुपतिवा तेरी सिनाड चोछ्ये जो नाङ्सुड। २२खोकी दी तेरी ओङ्ज्येन ति येशू ख्रीष्टकी शापकी वोक्ला ज्याक्नी नाङ्सुड। तमा चर्चकी खला साड खोला राड तेरी सिनाड चोछ्येवु जो नाङ्सुड। २३चर्च ति ख्रीष्टकी जु

यिन, ती चर्चला ख्रीष्टकी तेरी छेड्मा जो नङ्गिगी।

### ख्रीष्ट नेसुर थोपुप मिजी सम्बा

२ तोङ्ला ख्यिराड लाका मेलोकपा ताड दिक्पाला ख्येल्ली शिन वे। २ती पेला दी जम्बुलिङ ताड शैतानकी ओङ्ज्येनला वोतुप मीतिवी दोके ख्यिरा साड लाका मेलोकपा क्यासुड। ती शैतानकी राड तन्दा साड कोन्छ्योककी सुड मेङ्ग्येन्दुप तिवी खला ओङ्ज्येन किवी। ३ती दोके तोङ्ला दाक्पी साड सेमला शरुप तेरी लाका मेलोकपातिवा क्यानी मिजी क्योङ्गुप ताड रङ्गी जु ताड सेमगी नोवाला युवुजा। तुक क्यानी दाक्पु साड मी यम्बा दोके कोन्छ्योककी पर्च्या फोकुप गिपा च्युङ्गुप यिन। ४यिने कोन्छ्योक च्यङ्च्यु सेम्बा वोतुप तप्की खोकी दाक्पु तेरीला छासे ड्यङ्ज्ये क्या नाङ्सुड। ५दाक्पु दिक्पाला शोर्नी शिसिनाड खोकी कटिन नेमा राड दाक्पुला दिक्पा ने थर च्यिसुड। ६तमा खोकी मुला राड दाक्पुला सेन्बु लङ्नी देवाच्येनला येशू ख्रीष्टकी मुला ज्याक्नी नाङ्सुड। ७तुक क्यावु ति च्यम्बा वोतुप कोन्छ्योककी येशू ख्रीष्ट नेसुर दाक्पुला ग्यक्चेकी कटिन नङ्गुप ति त वुङ्गुप कल्वाला छ्या देन्दुपला यिन। ८च्यिलासिसिन दाक्पी खोला तेपा क्यानी खोकी कटिनकी राड दाक्पु दिक्पा ने थरुप यिन। दी ति दाक्पी

डारकी ड्येतुप मिन, यिने कोन्छ्योक नेमा थोपुप ड्येम्बा यिन। ६दाक्पी लाका ल्यामु क्यानी ड्येतुप मिन, मिसियाड मीतिवी ड राड यिन सिनी सिवी। १०दाक्पु ति कोन्छ्योककी थोक्ला लाका ल्यामु कितुपला ख्रीष्ट नेसुर खोकी छ्याककी ज्येवु यिन। दाक्पु खोकी नोवाला वोतुप दोके युक्शी सिनी खोकी दाक्पुला तोड्ला के ज्येवु यिन।

### ख्रीष्टला च्यिक्पा राड च्युङ्गुप

११तुक क्यानी नासाम तोड, तोड्ला ख्यिराड मिरिक यम्बाकी मीतिवा यिन्दुप तप्की कोन्छ्योकला डो माशेनोक। ती पेला यहूदी च्येतुप लुक्सु क्यावुतिवी ख्यिराडला ड्यिङ्मर क्यानी च्येतुप लुक्सु माक्यावुतिवा यिन सिनोक। १२ती पेला येशू ख्रीष्टला ख्यिरा डो माशेवु तप्की इस्राएलकी गिपा माच्युड। तमा ख्यिराड ति कोन्छ्योककी थाक्छ्येतुप ठिम नेसुर थाक्किरड्बु गल्नी दी जम्बुलिडला रेवा मेतुप ताड कोन्छ्योक डो माशेनी दे नोक। १३तोड्ला ख्यिराड मिरिक यम्बा यिन्दुप तप्की कोन्छ्योक नेमा थाक्किरड्बु गाल्नोक, यिने त याड येशू ख्रीष्टकी ठक नेसुर ख्यिराड कोन्छ्योक ताड मुला थाक्ड्यमु गल वे। १४दाक्पुला सेम च्यिक्पा राड जो नङ्गुप ति येशू ख्रीष्ट यिन। खोकी राड यहूदी ताड यहूदी मिन्दुप मिरिक यम्बाकी मीतिवा ड्यिकरला

च्यिक राड जो नाड्सुड। तमा खो टुड्नी खोरो जु नेसुर दाक्पी पर्ला डला जोप तम्जी मेलोक्पातिवा तेरी ना ताड्सुड। १५तमा यहूदीतिवी छ्यो नाड्ला वोतुप तेरी लुक्सुतिवा ना तड्नी खो नेसुर यहूदी ताड यहूदी मिन्दुप मिरिक यम्बा ड्यिकरला लोदिमु वोतुप मी सम्बा जो नाड्सुड। १६तमा येशू ख्रीष्ट ग्यडिङ्गडला टुड्नी दाक्पु ड्यिकरला डला गलुप ति च्यिक राड जोनी कोन्छ्योक ताड मुला थिन च्यिसुड। तमा यहूदी ताड मिरिक यम्बाकी मीतिवी पर्ला ड्यिङ्मर कितुप ताम्डेतिवा ना ताड नाड्सुड। १७तमा खो फेप्नी ख्युरुड थाक्किरड्बु वोतुपतिवाला ताड थाक्ड्यमु वोतुपतिवाला साड लोदिमु तेरुप सुड ख्याप्टाक क्या नाड्सुड। १८येशू नेसुर राड दाक्पु ड्यिकरला कोन्छ्योककी थु चाड्मा ड्येनी ती थु चाड्मा नेमा राड दाक्पु ड्यिकर पपा कोन्छ्योककी चाला लेप थुप्किवी।

१९तुक क्यानी त याड ख्यिराड छ्यिङ्गपकी मी ताड मिमेलुङ्गुड दोके साड मिन, यिने चाड्मा वोतुप तेपा कितुप मीतिवा ताड मुला लुड्बा च्यिककी ज्यिक्तेम्बा ताड कोन्छ्योककी मिछाडतिवा यिनो। २०ती मिछाडतिवा ति लोमा छ्येतिवा ताड कोन्छ्योककी लुङ्तेम्बातिवी जोवु डम्ज्यी रम्बु दोके यिन। तमा येशू ख्रीष्ट ति ती डम्ज्यीकी खक्छ्येवु सुरकी दो दोके यिन। २१येशू ख्रीष्ट

ताड मुला च्यिक्पा राड जोनी कोन्छ्योककी मिछाडतिवा तेरी थिन्नी खोकी थोक्ला कोन्छ्योककी ल्हडाड ति मड मड पोरिन डिवी।  
 २२ येशू ख्रीष्ट नेसुर ख्यिराड साड थु चाड्माकी ओडला कोन्छ्योक ज्युवु दासा च्युङ्गुपला तेरी मुला थिन्नी च्यिक्पा राड जोयी डिवी।

### मिरिक यम्बाकी कोर्ला पावलकी ख्याप्टाक क्यावु

३ ती तप्की ड पावल ख्यिराड यहूदी मिन्दुप मिरिक यम्बातिवी थोक्ला चोन्खाडला शोर्नी वे।  
 २ ख्यिराड यहूदी मिन्दुप मिरिक यम्बातिवाला लेन ल्यामु ख्याप्टाक कितुपला कोन्छ्योककी डला चेक तेतुप कटिनकी कोर्ला वुतुड के ख्यिरा थोनी वे सिरुप ति डला नोवा वे।  
 ३ खोकी नोवा ति छ्याकला नोक। ती ति खोकी डला ज्यल्का नेसुर हाक्को च्यिसुड। तीकी कोर्ला तोड्ला साड डे ख्यिराडला चेयी टिनी वे।  
 ४ ती डे टिवु ताम्डे ति ख्यिरा रासिन ख्रीष्टकी छ्याकला वोतुप ताम्डेकी कोर्ला डे चो हाक्कोनोक सिरुप ति ख्यिरा साड हाक्कोकितो।  
 ५ तोडगी गिपाकी मीतिवाला हाक्को माच्यिवु ताम्डे ति खोकी लोमा छ्येतिवा ताड कोन्छ्योककी लुड्तेम्बातिवाला खोरे थु चाड्मा नेसुर तसाम ठछ्येली छ्या तेन वे।  
 ६ ती छ्याकला वोतुप ताम्डेकी तेन्दोक ति लेन ल्यामु नेसुर राड यहूदी

मिन्दुप मिरिक यम्बातिवाला साड यहूदीतिवाला थोपुप कोन्छ्योककी मोलाम ति मुला राड थोप्नी वे। तमा दाक्पु तेरी येशू ख्रीष्ट ताड मुला जु च्यिक्पा राड च्युङ्गुनी खोकी खोरे मीतिवाला थाक्छ्येन नङ्गुप साड मुला राड थोप्नी वे।

७ कोन्छ्योककी ओड छ्येवु लाका नेसुर दी लेन ल्यामु ख्याप्टाक कितुपला डला खोकी लावा जो नङ्गुप यिन। तुक क्यावु ति खोकी कटिनकी ड्येम्बा यिन।  
 ८ खोला तेपा कितुप मीतिवा तेरीकी पर्ला ड ति तेरी सिनाड छ्युडा यिन्सिनाड ख्रीष्टकी मोलाम नङ्गुप ग्यक्चेकी लेन ल्यामु ति यहूदी मिन्दुप मिरिक यम्बातिवाला ख्याप्टाक कितुपला डला दी कटिन ति नङ्गुप यिन।  
 ९ तमा तेरी च्यालकतिवा ज्ये नङ्गुप कोन्छ्योककी ताड्बो ताड्बो नेज्युनी छ्याकला वोतुप नोवाकी तेन्दोक ति काड यिन सिनी तेरी मीतिवाला ख्याप्टाक कितुप कटिन ति डला नङ्गुप यिन।  
 १० ती ति चर्च नेसुर खोकी नम्बा कुतुक कुतुककी रिक्पा ति देवाच्येनकी ग्येला कितुप ताड ओङ्ज्येन वोतुपतिवी पर्ला तसाम छ्या देन्दुपला खोकी दुक क्या नङ्गुप यिन।  
 ११ खोकी तुक क्या नङ्गुप ति दाक्पी चोवो येशू ख्रीष्ट नेसुर थल्मा नेज्युनी खोरे नोवाला वोतुप दोके क्या नङ्गुप यिन।  
 १२ दाक्पी खोला तेपा क्यावु तप्की दाक्पु तेन्तेन ताड डाडेड

क्यानी खोकी चिप्ला डोप ड्येकिवी।  
 १३तुक क्यानी ड ख्यिराडला गोड्बा  
 शोयी, ख्यिरा थोक्ला डे छेटाड खुसुंड  
 सिनी ख्यिराड यिछ्येता माकी। दी ति  
 ख्यिरा थोक्ला छासे ताड्देन वोतुप  
 ताम्डे यिन।

### एफिससला वोतुप चर्चकी थोक्ला मोपोर

१४-१५ती तप्की जम्बुलिड ताड  
 देवाच्येनला वोतुप तेरी मिछाडतिवी  
 मिड जो नड्गुप पपा कोन्छ्योककी  
 चिप्ला पुमुड चुनी मोपोर कितिन।  
 १६खो ताड मुला ग्यक्चेकी मोलाम  
 वोतुप तप्की खोकी थु चाड्माकी  
 डारकी ख्यिरा सेमगी दिड्ला रम्बु  
 जो नड्शी। १७तमा ख्यिरा क्यावु तेपा  
 नेसुर ख्रीष्ट ख्यिरा सेमला ज्युशी।  
 ख्यिरा च्यिककी च्यिकला कितुप  
 ड्यिड्ज्ये ति दोड्बी मर क्यड्गुप  
 दोके रम्बु च्युड्शी। १८ख्यिराड तेपा  
 कितुपतिवा तेरी खोकी मिछाड च्यिक  
 राड च्युड्नी ख्रीष्टकी ड्यिड्ज्ये ति  
 चो थेन्बु वोतुप ताड चो मोमु ताड  
 चो रिड्बु वोतुप ति हाक्को थुप्शी।  
 १९तमा ख्रीष्टकी ड्यिड्ज्ये ति चुका  
 रिक्पा सिनाड चोछ्ये वे सिनी ख्यिरा  
 हाक्को थुप्शी। तमा काड साड  
 ड्युड्मु मेतुप कोन्छ्योककी तेरी  
 छाछिडीकी ख्यिरा मिजीला छाछिडी  
 छेड्शी।

२०कोन्छ्योककी दाक्पी नाड्ला  
 लाका कितुप खोरे ओड्ज्येन नेमा राड

दाक्पी लड्गुप ताड नासाम तड्गुप  
 सिनाड ल्हक्पा दाक्पुला नड्गिवी।  
 २१ती कोन्छ्योकला राड थल्मा  
 नेज्युनी तिड्मा सेक चर्च ताड येशू  
 ख्रीष्ट नेसुर नरीकी नरी मोवा वुड्शी।  
 आमिन।

### ख्रीष्ट ताड मुला च्यिक राड जोवु

४ तुक क्यानी ख्रीष्टकी थोक्ला  
 कोन्खाडला शोरुप ड  
 ख्यिराडला ठाकुरे सिनी गोड्बा शोयी।  
 कोन्छ्योककी ख्यिराडला काडगी  
 थोक्ला कताड वे, ती दोके राड मिजी  
 क्योड। २नरी सेम बोल्मु ताड च्यिड्च्यु  
 सेम्बा च्युड्नी हम क्यानी च्यिककी  
 च्यिकला ड्यिड्ज्ये की। ३खोकी थु  
 चाड्माकी ख्यिराड तेरीला सेम च्यिक  
 राड जोवु तप्की ख्यिराड सेम थिन्नी  
 लोदिमु क्यानी दे थुपा की। ४खोकी  
 ख्यिराडला कताड नड्गुप पेला रेवा  
 च्यिककी थोक्ला कताड नड्गुप दोके  
 जु साड च्यिक राड यिन, खोकी थु  
 चाड्मा साड च्यिक राड यिन। ५चोवो  
 कोन्छ्योक ताड तेपा ताड बप्तिस्मा  
 च्यिक राड यिन। ६दाक्पु तेरीकी  
 पपा कोन्छ्योक ति च्यिक राड यिन।  
 खोकी दाक्पु तेरीकी खला ओड्ज्येन  
 क्या नड्गिवी, तमा खो दाक्पु तेरीकी  
 मुला ज्युनी दाक्पी मिजी नेमा लाका  
 क्या नड्गिवी।

७यिने येशू ख्रीष्टकी नोवाला वोतुप  
 ड्येम्बा दोके खोकी दाक्पु तेरीला  
 कटिन नम्बा कुतुक कुतुक नड्नी वे।

८ती तप्की कोन्छ्योककी सुडला  
 तीकी थोकला दुक सिनी टि वे,  
 “खो येर केला तेड फेपुप  
 पेला चोन्खाडला शोरुप  
 मीतिवाला खोकी मुला राड  
 टिनी फेप्सुड,  
 तमा खोरे मीतिवाला ड्येम्बा  
 नाड्सुड।”\*

९दी खो येर केला तेड फेपुप तेन्दोक  
 ति काड यिन सिसिन, खो ति गोमाला  
 दी जम्बुलिङला पाप्नी फेप्सुड  
 सिक्यावु यिन। १०खो मर फेप्सिमा  
 तेरी च्यालकतिवी खला ग्येला  
 कितुपला येलुड खो देवाच्येन सिनाड  
 मड केला तेड फेप्सुड। ११तमा खोकी  
 मी ललाइला ति लोमा छ्ये, ललाइला  
 ति खोरे लुड्तेम्बा, ललाइला ति  
 ख्याप्टाक कितुप मी, ललाइला ति  
 चर्चला गोमा कितुप गेकेन, ललाइला  
 ति खोकी सुड लोपुप गेकेन जो  
 नाड्सुड। १२खोकी तुक क्या नङ्गुप  
 ति तिवा तेरीकी खोकी लाका ल्यामो  
 कितुप जोनी ख्रीष्टकी जु यिन्दुप  
 चर्च ति येर फर्शी सिनी यिन। १३तमा  
 दाक्पु तेरी कोन्छ्योककी सेवुला तेपा  
 कितुप ताड खोला डो शेवुला च्यिक  
 राड च्युङ्नी ख्रीष्टला छाछिडी वोतुप  
 दोके दाक्पु साड खोकी छाछिडीला  
 लेपुप सेक मड मड फरिन डिवी।  
 १४तुक क्यानी दाक्पु मीतिवी जिनोक  
 ताड दुक्टा ताड नम्बा कुतुककी येन्देन

मेटेड्बुला फार छुर युक्पु आडातिवा  
 दोके मोडोशी। १५बोरु ख्यिराड ति  
 च्यिककी च्यिकला ड्यिङ्ज्ये क्यानी  
 ताम्डे टेड्बु लाप्नी तेरी ताम्डेला  
 ख्रीष्ट दोके छाछिडी च्युङ्नी फरिन  
 डो गोकिवी। खो ति गो यिन। १६ती गो  
 नेसुर दाक्पी जुकी तेरी थिन्जामतिवा  
 थिनी जु च्यिक च्युङ्गिगी। तमा जुला  
 वोतुप तेरी येन्लकतिवी दाक दाक्पी  
 लाका ल्यामो क्यासिमा जु ति मड  
 रम्बु डिवी। तमा च्यिककी च्यिकला  
 ड्यिङ्ज्ये कियी ती जु ति खोरुड राड  
 फरिन डिवी।

### मिजी सम्बा थोपुप

१७ती तप्की ड दी ताम्डे ति चोवो  
 येशूकी मिडला ठाकुरे सिरिन। यहूदी  
 मिन्दुप मिरिक यम्बाकी मीतिवी तेर्मेकी  
 नासामतिवा तङ्नी मिजी क्यङ्गुप  
 दोके ख्यिराड ति तफेन्ला तुका मिजी  
 माक्योड। १८तिवी सेम क्योङ्बु  
 गल्नी नक्तोमी गलुप तप्की तिवी  
 कोन्छ्योककी टेड्बु हाक्माकोनी  
 खोकी नङ्गुप मिजी ति तिवी माङ्ग्ये  
 वे। १९तिवा डोछा मेतुप ताड शम्डेन  
 कितुप ताड देर्पाला ख्येल्ली सेम नोजु  
 कितुप गल वे।

२०यिने ख्यिरा याड ख्रीष्टकी कोर्ला  
 तुकै मालाप वे। २१ख्यिरा याड येशू  
 ख्रीष्टला वोतुप टेड्बुकी कोर्ला  
 लाप्नी हाक्कोनी वे सिरुप ति डला



छया वे। <sup>२२</sup>तुक क्यानी ख्यिरा मिजी ड्यिङ्बा नेसुर वुङ्गुप किताड नालु ति मज्या ड्यिङ्बा पिनी क्युरुप दोके क्यानी क्युर। ती मिजी ड्यिङ्बा ति जिनोक जोप नासाम दुक्टा नेसुर वावु तप्की ना डिवी। <sup>२३</sup>तमा ख्यिरा सेम ति कोन्छ्योककी थु चाङ्मा नेसुर टेङ्बु जोनी <sup>२४</sup>मज्या सम्बा कोन्दुप दोके ख्यिरा मिजी साड सम्बा फोकिवी। ती मिजी सम्बा ति कोन्छ्योक दोके टेङ्बु ताड मोवा वोतुप च्युङ्गुप यिन।

<sup>२५</sup>तुक क्यानी ख्यिराड जिनोक जोप क्युर्नी रङ्गी मीतिवी मुला ताम्डे टेङ्बु लोप। च्यिलासिसिन दाक्पु तेरी जु च्यिककी येन्लकतिवा यिन। <sup>२६</sup>ख्यिराड ड्यिर्मु लासिनाड दिक्पा ति माकी, ड्यिमा गावु सिनाड गोमाला के ती ड्यिर्मु ति तोर्शी। <sup>२७</sup>डेला ख्यिरा नाङ्ला लाका कि माज्यी। <sup>२८</sup>कुन कितुपतिवी साड तफेन्ला कुन मिकिशी। तीकी लाका टेमु क्यानी सशी, तमा कतुकारला ख्येलुपतिवाला तेर थुप्शी। <sup>२९</sup>ख्यिरा ख नेमा चोताम मालाप, यिने मीला यर्के लोङ्गुप ताड लप गोवु ताम्डे ल्यामु तिराड लोप। तमा ड्येन्दुपतिवाला साड कटिन थोप्शी। <sup>३०</sup>तमा कोन्छ्योककी थु चाङ्माला सेम्दुक मालोड, ती थु चाङ्माकी राड ख्यिराडला दिक्पा ने थर ज्यितुप तुजे मालेपा सेक्ला ख्यिराड खोकी ति यिन सिनी त ग्यप्नी वे। <sup>३१</sup>तेरी सेम मेलोक्पा वोतुप ताड

शेताड कितुप ताड ड्यिर्मु कितुप ताड हराड हुरुड कितुप ताड मारे तोङ्गुप तेरी परकी दुक्टातिवा मुला राड क्युर। <sup>३२</sup>बोरु चुक क्यानी येशू ख्रीष्टकी क्या नङ्गुप लाका नेसुर कोन्छ्योककी ख्यिरा दिक्पा माफ नड वे, तुक राड क्यानी ख्यिरा साड च्यिककी च्यिकला सेम बोल्मु ताड च्यम्बा क्यानी माफ बिन।

### ठछ्येलीला युक्पु

**५** तुक क्यानी ख्यिराड ति कोन्छ्योककी ड्यिङ्ज्येवु आडातिवा यिन्दुप तप्की खोकी लुमु से गोकिवी। <sup>२</sup>येशू ख्रीष्टकी दाक्पुला ड्यिङ्ज्ये क्या नङ्नी कोन्छ्योकला गा लङ्गुप बुल्वा ताड जिन्बा च्युङ्नी दाक्पी दिक्पी थोक्ला टुङ्सुड। तुक राड क्यानी ख्यिराड साड च्यिककी च्यिकला ड्यिङ्ज्ये की।

<sup>३</sup>यिने ख्यिरा पर्ला शम्डेन कितुप ताड तेरी परकी लाका मेटेङ्बु कितुप ताड देर्पा कितुप लाकातिवा क्युर। च्यिलासिसिन तुका लाकातिवा कोन्छ्योकला तेपा कितुप मीतिवी कितुप पोमु मेङ्गिगी। <sup>४</sup>ताम्डे चोताम लपुप ताड अम्बारङ्गिङ्ग कितुप ताड ख्येप्साड मेवु ताम्डे ति क्युर, बोरु कोन्छ्योकला थुचिछे पुल। <sup>५</sup>दी ताम्डे ति ख्यिरा तेन्तेन क्यानी हाक्कोवा की। शम्डेन कितुप ताड मेटेङ्बु कितुप ताड देर्पा कितुप ति कुला छ्यो तङ्गुप च्यिन्दै यिन। तुका

मीतिवा ख्रीष्ट ताड कोन्छ्योककी  
 ग्येल्खापला शुक्र मोछ्योवी। ६सी साड  
 ख्यिराडला ताम्डे मेशोलोक लापनी  
 जिनोक मोजोशी, च्यिलासिसिन ती  
 ताम्डेकी जोसालेन्सिन कोन्छ्योककी  
 सुड मेड्येन्दुपतिवी खला खोकी  
 पचर्या फोकिवी। ७तुक क्यानी  
 ख्यिराड तुका मीतिवी दला माशुक।  
 ८च्यिलासिसिन तोड्ला कोन्छ्योकला  
 डो माशेवु पेला ख्यिराड नकतोमीला  
 युवु यिन, त याड ख्यिराडला खोकी  
 ठछ्येली जो नाड्सुड। तुक क्यानी  
 ख्यिराड ठछ्येलीला युसा। ९ती  
 ख्यिरा ठछ्येलीकी लाकातिवा ति  
 ल्यामु वोतुप ताड टेड्बु ताड काड  
 साड जिनोक मेतुप यिन। १०तमा  
 कोन्छ्योककी सेमला डोप लाका  
 ति काड यिनोक ती ति लोपुप  
 छोल। ११नक्तोमी वुडगी तेमें वोतुप  
 लाकातिवाला माशुक, बोरु तुका  
 लाका ति मेलोकपा यिन सिनी छ्या  
 तेन। १२च्यिलासिसिन तुका मीतिवी  
 छ्याकला क्यावु लाका मेलोकपातिवी  
 कोर्ला ताम्डे कितुप साड डोछा यिन।  
 १३ठछ्येलीकी छ्या देन्दुप पेला बानी  
 ज्यकुप ताम्डेतिवा तेरी ठछ्येली  
 थोड्गिगी। १४च्यिलासिसिन तेरी  
 ताम्डेतिवा थोड ज्यितुप ति ठछ्येली  
 यिन। ती तप्की मीतिवी दुक सिनी  
 सिवी,

“ओ ड्यिलोकुपतिवा लो!

तमा ख्यिराड शेषतिवा शेष नेमा  
 येर खोक लो!

ख्रीष्टकी ख्यिराडला वोसिर  
 नडिगवी।”

१५तुक क्यानी ख्यिरा किताड नालु  
 ति चुकै वे, ल्यामो क्यानी नासाम तोड!  
 रिक्पा मेतुप मी दोके मिन, यिने रिक्पा  
 वोतुप मी दोके क्यानी युसा। १६त याड  
 तुजे ल्यामु मेतुप तप्की ख्यिराडला  
 वोतुप च्युतिवाला तुक राड डो माज्यी।  
 १७तुक क्यानी अम्बारडिशड माकी,  
 यिने कोन्छ्योककी नोवा काड यिनोक  
 सिनी हाक्कोवा की। १८छ्याड आराक  
 थुनी जिनी रडगी जुला ना मातोड, यिने  
 खोकी थु चाडमाकी क्येड्नी देता।  
 १९च्यिककी च्यिकला कोन्छ्योककी  
 थु चाडमा नेसुर वुड्गुप खोला सोवा  
 देकुप तेरी परकी लुतिवा लोसा।  
 तमा दाक दाकपी सेमगी दिड नेज्युनी  
 दातिवा तेन्नी चोवो येशूला सोवा  
 तेक। २०नरी तेरी ताम्डेकी थोकला  
 दाकपी चोवो येशू ख्रीष्टकी मिडला  
 पपा कोन्छ्योकला थुचिछे पुल।

२१येशू ख्रीष्टला ताड्देन क्यानी  
 च्यिक ताड च्यिककी ओडला देता।

ख्योवा ताड पेर्मीकी कोर्ला

२२पेर्मीतिवा, कोन्छ्योककी कला  
 युकुप दोके दाक दाकपी ख्योवी  
 ओडला देता। २३च्यिलासिसिन  
 ख्रीष्ट ति चर्चकी गो यिन्दुप दोके  
 पेर्मीकी गो ति ख्योवा यिन। तमा चर्च  
 ति ख्रीष्टकी जु यिन, खो ति चर्चला  
 थर ज्यितुप यिन। २४ख्रीष्टकी कला  
 चर्चकी ड्येन्दुप दोके पेर्मीतिवी साड

ख्योवी काड सिक्वावु ति तेरी ड्येन गोकिवी।

२५ ख्योवातिवा, ख्रीष्टकी चर्चला ड्रियड्ज्ये क्यानी खोरो मिजी साड चर्चकी थोकला जिन्बा च्युड्गुप दोके दाक दाकपी पेर्मीतिवाला ड्रियड्ज्ये की। २६ खोकी तुक क्या नड्गुप ति चर्चला खोकी सुड नेसुर चाड्मा ताड टेड्बु जो नाड्शी, २७ तमा टेमा माछ्यावु ताड ड्येर्मा माच्यम्बुप ताड काड साड मडी मेतुप ड्छ्येर्मु चर्च जोनी खोरुडला राड छ्या देन्शी, तमा ती चर्च ति चाड्मा ताड क्येन मेतुप वुड्शी सिनी यिन। २८ तुक राड क्यानी ख्योवातिवी साड दाक दाकपी पेर्मीला खोरुडला दोके ड्रियड्ज्ये कि गोकिवी। खोरो पेर्मीला ड्रियड्ज्ये कितुप तीकी खोरुडला साड ड्रियड्ज्ये किवी। २९ च्यिलासिसिन चुका मी तीकी साड खोरो जुला ड्रियड्मर मिकिवी, यिने तीला समा तेरुप ताड ल्हाटे किवी। ती दोके ख्रीष्टकी साड चर्चला तुक राड क्या नड्गिगी। ३० च्यिलासिसिन दाकपु ति खोकी जुकी येन्लक यिन। ३१ कोन्छ्योककी सुडला दुक सिनी टि वे, “तुक क्यानी मी तीकी खोरो पपा आमाला क्युर ज्याकनी पेर्मी ताड मुला थिन्नी देकिवी। तमा तिवा ड्रियवुकी जु ति च्यिक राड डिवी।”\* ३२ दी ति छासे छ्याकला

वोतुप ताम्डे यिन। ड ति दी ताम्डे ख्रीष्ट ताड चर्चकी तम्जीकी कोर्ला लपिन। ३३ काड यिन्सिनाड ख्यिराड तेरीकी दाक दाकपी पेर्मीला रडला दोके ड्रियड्ज्ये किशी, पेर्मीतिवी साड रडगी ख्योवाला ताड्देन किशी।

### पपाआमा ताड

#### पुज्युडपुमतिवाला टोड्गु

६ पुज्युडपुमतिवा, कोन्छ्योककी क नड्गुप दोके दाक दाकपी पपाआमी खला ड्येन, च्यिलासिसिन दी ति ताम्डे टेड्बु यिन। २ रडगी पपाआमाला ताड्देन की\*, दी ति तोड्ला के कोन्छ्योककी मोशाला थाक्छ्येन नड्गुप क तड्बु यिन। ३ तुक क्यासिन ख्यिराड दी जम्बुलिडला कोन्छ्योककी मोलाम थोप्नी छे रिड्बु च्युड्गिगी।

४ पपातिवा, खोरो पुज्युडपुमतिवाला ड्रियर्मु मालोड, यिने तिवाला चोवो येशूकी येन्देन ताड तालिम बिन्नी ज्होल।

### योक्पु ताड

#### ज्यिन्दाकतिवाला टोड्गु

५ ख्यिराड योक्पुतिवा, ख्रीष्टला ताड्देन क्यावु दोके दी जम्बुलिडकी ख्यिरा ज्यिन्दाकतिवी सिक्वावु ताम्डे ति ज्यिवा क्यानी ज्हुकिन सिरा सेमगी दिड नेज्युनी की। ६ मीतिवाला गा



लोङ्गुपला तिवी मिङ्गाला तिराड छ्या देन्दुप लाका माकी, यिने ख्रीष्टला शब्ज्यी पुलुप दोके सेम टेङ्बु क्यानी कोन्छ्योककी नोवाला वोतुप लाका की। ७मीतिवी थोकला मिन, यिने चोवो येशूला शब्ज्यी पुलुप दोके सेम गा क्यानी किसा। ८दी ताम्डे ति हाक्कोवा की। योक्पु यिन्शी मिन्शी सी लाका ल्यामु किवे, तीला चोवो येशूकी छ्यक्तक नङ्गितो।

९ज्यिन्दाकतिवा, रङ्गी योक्पुतिवाला किताड ल्यामु की, तिवाला चोरु मादेन। दी ति हाक्कोवा की, ख्यिराड

ड्यिकरकी ज्यिन्दाक ति देवाच्येनला ज्यु वे। खोकी मुला साड ख्ये मेबेवी।

### कोन्छ्योककी नङ्गुप मक्मीकी लाक्च्येतिवा

१०तेरी सिनाड तिङ्गला ड सिरिन, ख्यिराड चोवो येशूकी ओडला डार छ्येवु वुड गोकिवी। ११शैतानकी च्युतिवी तेन्दोकला लानी दे थुपुपला कोन्छ्योककी नङ्गुप तेरी मक्मीकी लाक्च्येतिवा लोसा। १२च्यिलासिसिन दाक्पी ग्यकुप मक ति मी ताड मुला मिन, यिने ओङ्ज्येन कितुपतिवा ताड डार वोतुपतिवा ताड दी जम्बुलिङ्की दुक्टाकी डार ताड देवाच्येनला वोतुप डैतिवी मुला यिन। १३तुक क्यानी ती तेरी मक्मीकी लाक्च्येतिवा लङ्नी ती तुजे मेलोकपाकी खला ग्येल थुपा की। तमा ती मक ग्यकुप लाका तेरी सिन्सिमा रम्बु क्यानी दे थुपा की।

१४ती तक्पी ख्यिराड केल्दाडला जिनोक मेतुप करा च्यी\*। तमा छेकोकला टेङ्बुकी क्योरुप च्यालक कोन। १५तमा लोदिमु नङ्गुप कोन्छ्योककी लेन ल्यामु ख्याप्टाक कि डोपला काङ्बाला काचा कोन\*। १६लकला तेपा रम्बुकी खोरुड ज्होकुपला क्योरुप च्यालक खुर, तुक क्यासिन ख्यिरा तेन्दोकला लावु डेकी तेरी मेलापतिवा से थुप्किवी। १७गोला दिक्पा ने थरुप शमुड कोन\*। तमा

कोन्छ्योककी थु चाङ्माकी खुर्पा  
 खुर, ती ति कोन्छ्योककी सुड यिन।  
 १८नरी खोकी थु चाङ्माकी क्येङ्नी  
 तेरीकी थोक्ला मोपोर ताड गोङ्बा  
 पुल। तोजो तिराड मिन, टेमु ताड  
 च्याङ्से क्यानी कोन्छ्योकला तेपा  
 कितुपतिवा तेरीकी थोक्ला नरी मोपोर  
 किसा। १९ड खोकी सुड ख्याप्टाक  
 कितुप पेला ज्यिवा माक्यावा क्यानी  
 छ्याकला वोतुप कोन्छ्योककी  
 सुङ्गी तेन्दोक ति ख्याप्टाक कि  
 थुप्शी सिनी मोपोर क्या नाड।  
 २०तीकी थोक्ला राड ड च्याटोक  
 ग्यप्नी चोन्खाडला वे, यिन्सिनाड ड  
 ख्रीष्टकी लेन ल्यामु ख्याप्टाक क्यावु  
 मी यिन। डे चुक क्यानी लप गोकिवी  
 ती ति डाडेड क्यानी लप थुप्शी सिनी  
 मोपोर किसा।

### पावलकी तिङ्मी मोलाम

२१ड चुकै वे, काड कियी वे, ती  
 ति ख्यिरा साड हाक्कोशी सिनी  
 कोन्छ्योकला ल्यामो क्यानी शब्ज्यी  
 बुलुप डे ड्यिङ्ज्येवु नुप तुखिकसकी  
 तेरी ताम्डे ति ख्यिराडला शेकितो ।  
 २२दे ड्यिराडला चुकै वे ख्यिरा साड  
 हाक्कोशी, तमा ख्यिरा सेमला टोङ्गु  
 तेरुपला तीला डे ख्यिरा चाला तङ्गुप  
 यिनो।

२३पपा कोन्छ्योक ताड चोवो येशू  
 ख्रीष्ट नेमा खोला तेपा कितुपतिवा  
 तेरीला तेपा नेसुर वुङ्गुप ड्यिङ्ज्ये  
 ताड लोदिमु वुङ्गुशी। २४तमा दाक्पी  
 चोवो येशू ख्रीष्टला नरी ड्यिङ्ज्ये  
 कितुपतिवा तेरीकी मुला कटिन ति  
 थोप्शी।

